

## 瑜伽師地論卷第一百

彌勒菩薩說

唐三藏沙門玄奘奉詔譯

## 攝事分中調伏事擇攝第五之二

復次依毗奈耶勤學苾芻於其五處應正偏知云何爲五一事偏知二罪偏知三補特伽羅偏知四引攝義利偏知五損惱偏知云何事偏知謂蘊等五事如聲聞地已說云何罪偏知謂依毗奈耶勤學苾芻由五種相偏知所犯一者偏知犯罪因緣二者偏知犯罪等起三者偏知所犯罪事四者偏知犯罪加行五

者徧知犯罪究竟徧知犯罪因緣者。謂或貪因緣或瞋因緣或癡因緣。毀犯眾罪。徧知犯罪等起者。謂或有罪由身等起。非語非心或復有罪由語等起。非身非心或復有罪由心等起。非身非語或復有罪由身由心等起。非語或復有罪由語由心等起。非身或復有罪由身由語等起。非心或復有罪由身由語由心等起。無獨由心所犯眾罪。應從他處發露悔除。唯當懇誠深自防護。如有苾芻發起種種欲尋思等不善尋思。徧知所犯罪事者。謂犯罪事略有二種。一者有情數事。二者無情數事。徧知犯罪加行者。謂所犯罪

有二加行。一非所應作事業加行。二是所應作事業加行。徧知犯罪究竟者。謂於是處施設方便。即於是處而得究竟。非於中間有其退轉。以是緣故。所犯圓滿諸集麤罪。他勝眾餘方便中犯隕墜惡作。於彼方便及自聚中而得究竟。於隕墜罪諸方便中亦犯惡作。四種罪聚名有餘罪。他勝罪聚名無餘罪。若所犯罪由有智故。名不積集。或復從他而顯發故。亦不積集。與此相違。非不積集。若所犯罪已從於他。如法發露。方便悔除。名已顯說。與此相違。名未顯說。若所犯罪權持當悔。名有期願。與此相違。名無期願。若所犯

罪諸佛世尊於別解脫毗奈耶中建立爲犯名有制立與此相違名無制立。若所犯罪或約一類補特伽羅或復約時而不決定先無差別總相制立當知此罪名爲等運與此相違名非等運云何補特伽羅徧知謂由五相應知差別一由行差別故二由眾差別故三由增減差別故四由證得差別故五由觀察差別故由行差別者謂能徧知由貪等行有差別故彼有差別如聲聞地應知其相由眾差別者謂能徧知由苾芻苾芻尼等七眾別故彼有差別由增減差別者謂如一類補特伽羅或貴族出家或富族出家或

顏容端正其餘一類則不如是復有一類補特伽羅多聞博識語具圓滿大智大福於淨戶羅堅猛防護少有所犯多生惡作於犯於出能善了知其餘一類則不如是若能徧知如是等事當知說名徧知增減有差別故彼有差別由證得差別者謂能徧知從隨信行俱分解脫以爲後邊七種差別預流果向乃至最後阿羅漢果八種差別諸如是等補特伽羅差別分別如聲聞地已辯其相由觀察差別者謂能舉罪補特伽羅應善觀察所舉罪者然後應舉爲作憶念謂觀所舉補特伽羅爲於我邊有愛敬不廣說如經

應知其相。其所發舉補特伽羅亦應善察能舉罪者爲是愚夫顛狂癡騃非法舉罪欲於我所當作損害廣說如經應知其相爲是智者非狂非騃所有白品爲開舉不。如是觀察補特伽羅應正觀察補特伽羅徧知云何引攝義利徧知謂能徧知略有三種引攝義利何等爲三。一引攝自身利養義利。二引攝他身出罪義利。三引攝僧伽擯斥犯戒安樂義利引攝自身利養義利者謂若諸利養體是清淨是名真實。若諸利養體是清淨而堪要用非無所用徒

多貯畜凡百資緣如是名爲能引義利。若諸利養不過於時堪任受用是名應時。若諸利養其餘苾芻亦現引攝是名有伴。卽此有伴非引破僧名離破僧若所引攝利養義利具此五支安住正念以無染心應當受用如是引攝利養義利名爲無罪。引攝他身出罪義利者謂若所犯罪彼實現行是名真實。若復自知我能令彼出不善處安置善處如是名爲能引義利。若他說法敬事尊長恭承病等正加行時無容舉罪是名應時。若舉彼罪諸餘苾芻共爲助伴是名有伴。非此因緣能引破僧如是名爲第五清淨。若所引

攝出罪義利。真此五支安住正念無染汙心如慈善友以柔軟言應引攝他出罪義利。如引攝他出罪義利。引攝僧伽擯斥犯戒安樂義利當知亦爾。而差別者。若因擯斥其被擯者不與能擯命爲障礙。或不因此壞僧居園亦不因此損壞制多及不損餘同梵行者。如是名爲能引義利與此相違應知說名引無義利。云何損惱徧知。謂有五種現法損惱。凡夫所趣愚癡所趣智者所離雖實非狂如狂所作。乃至唯有虛誑稽畱都無增長所有義利。云何爲五。謂有一類傷悼死亡以無量門而自煎迫傷淪喪者。是名第一現

法損惱。凡夫所趣乃至廣說復有一類幸有所餘易活方便而於衢路大市廊間分解支節疑命殆盡邪苦逼己以自存活是名第二現法損惱。凡夫所趣乃至廣說復有一類爲性慳貪慳垢所蔽幸有種種養命資緣而大艱辛以自存活是名第三現法損惱。凡夫所趣乃至廣說云何慳垢。謂八慳垢。一者宿習慳貪不串惠施慳垢。二者現法上品顧戀身命慳垢。三者於同分友共住隨轉諸有情所不串習悲悲心微劣慳垢。四者見田寡德毀犯正行慳垢。五者於諸財物起難得想慳垢。六者三時憂悔慳垢。七者於諸財

寶唯見功德不見過患。慳垢八者邪施迴向。慳垢當知是名八種慳垢。復有一類愛樂天趣求欲生天不如實知生天道路。斷食投火墜高巖等自加逼害。是名第四現法損惱。凡夫所趣乃至廣說。復有一類愛樂清淨不如實知清淨道路。謂加苦法而得清淨。以無量門自爲逼害。是名第五現法損惱。凡夫所趣乃至廣說。如是五種現法損惱。依毗奈耶勤學苾芻當正徧知應速遠離。

復次依毗奈耶勤學苾芻成就五法。未生信者令其生信已生信者令倍增長云何爲五。一戶羅圓滿二

正見圓滿三軌則圓滿四淨命圓滿五遠離展轉鬪諍圓滿。尸羅圓滿略有十種。如聲聞地已辯其相。謂初善受持不太沈聚不太浮散乃至廣說。正見圓滿略有五種。一者增益薩迦耶見及邊執見已永斷故。二者損減撥無邪見已永斷故。三者取見謂諸見取及戒禁取已永斷故。四者妄計吉祥處見已永斷故。五者妄計非有爲有爲非有諸顛倒見已永斷故。軌則圓滿亦有五種。謂或依時務應所作事或依善品應所作事或依威儀應所作事隨順世間及毗奈耶所有軌則廣說應知如聲聞地淨命圓滿亦有五

種謂能遠離矯詐等五起邪命法。如聲聞地應知其相。遠離展轉鬪諍圓滿略有六種。謂離六種鬪諍根故。此中六種鬪諍根者。謂忿恨等廣說如經。又依六處應知建立六鬪諍根。云何六處。一者不饒益相二者樂隱已過。憍慢執持三者利養恭敬欲愛現行四者毀犯增上戒行五者毀犯增上心行六者毀犯增上慧行應知依第一處建立第一鬪諍根本乃至依第六處建立第六鬪諍根本謂有一類補特伽羅眾所識知廣從他處多獲利養由是因緣有所毀犯於所犯罪樂欲隱藏不欲令他知己所犯有諸苾芻既

爲助伴。所有僧事及其餘事。皆令彼作我獨蕭然自得而住。如是或有毀犯禁戒同梵行者正詰問時。便不分明假託餘事而有所說。如是名爲行矯。僞行誑謠處所。由此因緣起諸鬪諍。餘隨所應當知其相與是相違有五種法令。未信者轉增不信。令已信者尋還變革。

復次依毗奈耶勤學苾芻。成就五力於一切種等意。正行所有加行云何五力。一加行力。二意樂力。三開曉力。四正智力。五質直力。若有樂學。一切身分於諸學中正善修學。又於所學最極恭敬。爲自調伏爲般

涅槃。如是當知名加行力。若有所犯。由意樂故。速還出離。如是當知名意樂力。若於學處時時請問持三藏者。所有自愛諸善男子。應所修學。亦能開示。如是當知名開曉力。從他聞已。若於其中是真是實。無倒攝受。若於其中僞。毗奈耶像似正法諸惡言說違背法性。如實了知。雖不至彼躬申請問。所未開曉。而多聞。故於佛世尊所。不遮止亦不開許。能自思惟。惟於沙門性是能隨順。是能違逆。既了知已。如其所應能正修行。能正遠離。如是當知名正智力。若信解力離諸誑謠。無有少分許妄分別。非於少分所開許中。增益。

多分而起現行非於多分所開許中損減少分而起現行其所現行不增不減如是最初自生欣慶後令自他安樂而住修行正行非眩惑他如是當知名質直力

復次依毗奈耶所學加行應知有五補特伽羅品類差別謂有一類補特伽羅於善說法毗奈耶中依出家法始將發趣雖欲發趣仍未出家便生煩惱邪欲尋求以是緣故遂不出家復有一類既出家已煩惱熾盛故思犯罪由是因緣多諸憂悔便生煩惱邪欲尋求復有一類既出家已於出家法不生喜樂於捨

所學將欲發趣及於出家發生憂悔而作是念非我好作所謂出家彼由二緣發生煩惱邪欲尋求復有一類既出家已命難因緣不起故思違越所學乃至盡命愛樂出家勤修梵行彼非二緣發生煩惱邪欲尋求如是四種補特伽羅是異生類復有一類謂諸有學未得解脫卽此爲依於後第一慧解脫通達昇進如實了知是名第五補特伽羅卽此第五望前第四諸異生類由調善可愛有學解脫於後解脫通達昇進而有差別卽此當知已見蹄跡此中前三補特伽羅如其所應於發趣所生憂悔所生及俱所生

所有煩惱邪欲尋求應正除遣。於上解脫應正了知。第四唯於後上解脫應正了知。若能如是一切當得平等平等。

復次於三學中當知略有三種邪行。謂有一類補特伽羅先求涅槃而樂出家出家已後爲天妙欲愛味所漂所受持戒迴向善趣。唯護尸羅便生喜足是名外結補特伽羅於增上戒第一邪行。復有一類補特伽羅不唯護戒便生喜足而能趣證上諸世間隨一靜定。卽於此定深生味染不進上求聖諦現觀是名內結補特伽羅於增上心第二邪行。復有一類補特

伽羅是其有學已見諦跡由住放逸於現法中不般涅槃當知是名於增上慧第三邪行。

如是略引隨順此論境智相應調伏宗要摩怛理迦其餘一切隨此方隅皆當覺了。

攝事分中本母事序辯攝

如是已說毗奈耶事摩怛理迦云何名爲摩怛理迦事。謂若素怛纏摩怛理迦若毗奈耶摩怛理迦總略名一摩怛理迦雖更無別摩怛理迦然爲略攝流轉還滅雜染清淨雜說法故我今復說分別法相摩怛理迦。迦南曰。

要由餘釋餘 非卽此釋此 於前略序事

自後當廣辯

若有諸法應爲他說。要以餘門先總標舉復以餘門後別解釋。若如是者名順正理。非卽此門先總標舉還以此門後別解釋。如先總舉云何有爲後別釋言所謂五蘊。若如是者名順正理。非先總舉云何有爲後別釋言所謂有爲。如是一切應隨覺了。略由二相應知建立分別法相摩怛理迦。一者先略序事。二者卽依如是所略序事後當廣辯。

云何名爲先略序事。謂略序流轉雜染品事。及以還

滅清淨品事。云何流轉雜染品事。謂六識身自性所依所緣助伴事。若蘊界處事。若諸緣起處非處事。若三受事。若三世事。若四緣事。若諸業事。若煩惱事。若三界事。謂欲界等。若十有事。謂欲有色。有無色。有那落迦。有傍生。有鬼。有天。有人。有業。有中。有由。別離欲善趣惡趣。招引趣向。有差別故。若十一識住事。謂四識住與七識住。總合說故。若九有情居事。如經廣說。若五趣事。若四生事。若四入胎事。若四得自體事。若四食事。若四言說事。若四法受事。若四顛倒事。若苦諦事。若集諦事。如是等類名爲略序流轉雜染品事。

云何還滅清淨品事。謂滅諦事。若道諦事。若三摩地事。若諸智事。若此所引諸功德事。若七正法事。若七正作意觀察事。若三十七菩提分法事。若四修定事。若四法跡事。若奢摩他毗鉢舍那事。若四證淨事。若三福業事。若三學事。若四沙門果事。若四證淨事。若四聖種事。若三乘事。若四問記事。如是等類名爲略序。還滅清淨品事。如是等事廣辯建立。隨其所應。如前所說。彼彼地中及諸攝分應知其相。又一切事。以要言之。總有五事。一者心事。二者心所有法事。三者色事。四者心不相應行事。五者無爲事。

云何即依如是所略序事後當廣辯。謂略由四相廣辯彼事。何等爲四。一異門差別故。二體相差別故。三釋詞差別故。四品類差別故。異門體相釋詞差別。如攝釋分應知其相。品類差別復有八種。一建立有非有異非異性差別。二建立界地差別。三建立時分差別。四建立方所差別。五建立相續差別。六建立分位差別。七建立品分差別。八建立道理差別。由如是等八種差別。於一切事品類差別應隨覺了。

云何建立有非有異非異性差別。謂若略說有三種。有一者實有。二者假有。三者勝義。有云何實有。謂諸

詮表法有名可得。有事可得。此名於事無礙而轉非或時轉或時不轉。當知是名略說實有。如於色等諸法聚中建立墉室軍林草木衣食等相此相唯於此聚隨轉於餘退還色等諸相於一切處皆悉隨轉。故此相所詮實有當知餘相所詮假有。又此假有略有六種。一聚集假有。二因假有。三果假有。四所行假有。五分位假有。六觀待假有。聚集假有者謂爲隨順世間言說易解了故。於五蘊等總相建立我及有情補特伽羅眾生等想。此想唯能顯了此聚是故說名聚集假有。因假有者謂未來世可生法行由未生故。

雖非實有而有其因當可生故名因假有。果假有者所謂擇滅是道果故不可說無然非實有唯約已斷一切煩惱於當來世畢竟不生而假立故所行假有者謂過去世已滅諸行唯作現前念所行境是故說名所行假有已謝滅故而非實有分位假有者謂生等諸心不相應行如前意地已標辯釋卽於諸行由依前後有及非有同類異類相續分位假立生等非此生等離諸行外有真實體而別可得觀待假有者謂虛空非擇滅等虛空無爲待諸色趣而假建立於是處色趣非有假說虛空非離色無所顯法外別

有虛空實體可得。非無所顯得名實有。觀待諸行不俱生起於未來世不生法中立非擇滅無生所顯假說爲有。非無生所顯可說爲實有。云何勝義有。謂於其中一切名言一切施設皆悉永斷離諸戲論離諸分別善權方便說爲法性真如實際空無我等。如菩薩地真實義品第四所知障淨智所行真實應知其相與上相違當知非有。又由四種別無別故應知建立異不異性。一由所因別無別故。二由所依別無別故。三由作用別無別故。四由時分別無別故。若所因等諸法異相差別可得。此異於餘。若無異相差別可

得。此前及後與現無異。時分別者。謂一切行唯剝那住。卽此自體還望自體說爲不異。過剝那後說名爲異。由彼爲種而此得生說爲所因。若由眼等及大種等爲依而轉說名所依。若一切行別別功能說名作用。如是名爲建立第一。有非有異非異性品類差別。云何建立界地差別。謂欲色無色三界差別。言欲界者。謂下從無間上超他化至魔羅宮。其中諸行皆因欲界煩惱所生。於其三世與彼煩惱爲所依止。彼品麤重之所隨縛爲彼所繫。又欲界中一切煩惱全未離欲。非定地攝。色無色界一切煩惱。一分離欲定地

所攝餘煩惱相。如前應知。言色界者。謂四靜慮。并靜慮中間有十七地。無色界者。謂空處等四無色地。云何建立時分差別。謂於過去世。有無間已滅。有鄰近已滅。有久遠已滅。於未來世。有無間將生。有鄰近當生。有久遠當生。於現在世。有剎那現在。有眾同分現在。有相續未滅現在。

云何建立方所差別。謂有色諸法。據處所故。得有遠近方所差別。無色諸法。由無色故。無據處所。若依色法而得生起。卽於其處說有方所。此由轉相故。非據處所故。有色諸法具由二種。

云何建立相續差別。當知相續略有四種。自他根境有差別。故立四相續。一自身相續。二他身相續。三諸根相續。四境界相續。二是假建立。二是真實義。

云何建立分位差別。謂苦分位。樂分位。不苦不樂分位。卽是能順三受諸法。

云何建立品分差別。當知建立所治能治二品差別。謂染不染法。下劣勝妙法。麤細法。執受非執受法。有色無色法。有見無見法。有對無對法。有爲無爲法。有漏無漏法。有諍無諍法。有愛味無愛味法。依耽嗜依出離法。世間出世間法。墮攝非墮攝法。當知此中由

五因緣建立染法。一者於三受中如其所應爲雜染故。二者能偏攝受諸煩惱品麤重性故。三者能偏攝受現法當來非愛果故。四者能偏連結生相續故。五者能偏障礙一切善法及於所知障智生故。由是因緣名爲染法與是相違應當了知不染法相。此不染法略有二種謂善無記由臭爛不淨及煩惱不淨故名不淨。由於此中諸所有受皆悉是苦故名爲苦。由無常性故名不堅若由如是勝義道理性是不淨性是其苦性是不堅其性鄙穢名爲下劣。超過於此應知勝妙。又相待故下劣勝妙二相差別謂待色界欲

界是劣待無色界色界是劣若待涅槃三界皆劣。如是等類應當了知。微著差別故淨穢差別故勢用差別故應知建立色趣麤細輕等品類有差別故應知建立無色諸法所有麤細又有色法無色法由世俗勝義諦理易了難了故應知麤細二種差別。微謂極微聚。著謂所餘聚淨謂中有上地色聚穢謂餘有下地色聚。言勢用者謂若是處有地大等勢用增彊雖與餘聚其物量等而能勝餘麤顯可得輕等品類有差別者謂樂等諸受信等諸法有輕中上品類差別執受法者謂諸色法爲心心所之所執持由託彼故

心心所轉安危事同。同安危者由心心所任持力故其色不斷不壞不爛。卽由如是所執受色或時衰損或時攝益其心心所亦隨損益。與此相違名非執受言有色者謂能據方所言無色者謂不據方所。此約所緣領納流轉施設建立。言有見者謂若諸色堪爲眼識及所依等。示在此彼明了現前與此相違名爲無見。言有對者謂若諸色能礙他見礙他往來與此相違名爲無對。言有爲者謂有生滅繫屬因緣與此相違應知無爲。言有漏者謂若諸法諸漏所生諸漏麤重之所隨縛諸漏相應諸漏所緣能生諸漏於去

來今爲漏依止與此相違應知無漏能與當來生等眾苦爲生因故於現法中有罪性故名爲有諍與此相違名爲無諍。內門自體愛染隨故名有愛味與此相違名無愛味。外門境界愛著隨故名依耽嗜。如是相違名依出離。若法有漏有諍有愛味依耽嗜如是一切名爲世間。若能治此依世俗諦所起俗智及所引法亦名世間與此相違名出世間。若諸世間名墮攝法墮有情器欲色無色世間攝故。若出世間非墮攝法不墮前說世間攝故。

云何建立道理差別。謂四道理一相待道理二證成

道理三作用道理。四法爾道理。如是道理差別分別。如聲聞地應知其相。如是八種品類差別。及前所說異門體相釋詞差別。應知如前廣略所序。一切事中能正廣辯無過此辯。

復次喩柁南曰。

初聚相攝等。其次成就等。自性等因等。  
後廣說地等。

有九法聚攝一切法。何等爲九。一善法聚。二不善法聚。三無記法聚。四見所斷法聚。五修所斷法聚。六無斷法聚。七邪性定法聚。八正性定法聚。九不定法聚。

善等法聚。廣如意地已辯其相。見所斷法聚者。謂一切見。若依見等貪瞋癡慢。若惡趣業。若於諸諦猶豫疑等。修所斷法聚者。謂餘一切所應斷法。無斷法聚者。謂無漏法。邪性定法聚者。謂無間業及斷善根。正性定法聚者。謂學無學所有諸法。不定法聚者。謂餘非學非無學法。應知此中所有諸法。自性相攝他性相應。

或有一類補特伽羅成就善法及無記法。非不善法。謂諸聖者已離欲貪及此異生除種子法。或有一類補特伽羅成就不善及無記法。非諸善法。謂斷善根。

補特伽羅除種子法。無有成就善不善法。非無記法。或唯不善或唯無記而可得者。又於此中應知諸法。如其所應若得若捨。謂有一類由受所受故或捨所受故。或邪推求故。或正推求故。或轉形故。或法爾故。或離欲故。或加行故。或退失故。或得果故。或死生故。而有得捨。如別解脫律儀等法。由受彼故得由捨彼故捨。若諸善法由邪推求故捨。由正推求故得。由轉形故捨。苾芻律儀。或苾芻尼律儀。隨得其一二形生故。一切永捨。由法爾故。世間壞時能入法爾所得靜慮。由離欲故能得上地所有善法。由加行故能發依

彼所引功德。令現在前。由退失故還得先時諸下劣法。由得果故捨諸世法。得出世法及後明淨世間善法。由死生故。若生下時獲於生得善及不善無記諸法。若生上時唯得善法及無記法。諸有所捨。如其所應亦隨覺了無有相違諸心心所而共相應及與相攝。卽此剎那行還與此剎那。又無一切生死諸行可永斷法。又無諸行先未會生歟。然今起又一切行皆剎那生生剎那後必無停住諸行一生一住一滅。

又一切法一一自性無有第二自性可得。又定無有同類二法。一時相應。卽由第二自性無故。又非一法。

有乖異相二種作用。又一切行依於他轉而不自依。又非自性與自性俱亦不隨轉。又非卽此一剎那心與此剎那心爲所緣。又非卽此剎那自性與此剎那自性爲因。亦非後生爲前生因。亦非同類爲異類。因如不善望善。善望不善而作無記異熟果因。廣說地等。喩柁南曰。

初諸地諸依。次諦智加行。三摩地根道。

對治行修習。有漏無漏法。諸果諸因緣。

立補特伽羅。後徧知究竟。

有九種地。何等爲九。一資糧地。二方便地。三觀行地。

四見地。五修地。六有學地。七無學地。八聖者地。九異生地。先應積集出世資糧。次爲盡漏勤修方便。次修隨順抉擇分時正觀諸諦。次能證入正性離生。次後漸證四沙門果。此中前三是有學地。其第四果是無學地。證離生已。一切世間漸昇進道名爲修地。卽總攝見學無學地名聖者地。此餘一切名異生地。謂若未修加行。若已修加行。若已離欲。一切異生。

復有九依。能盡諸漏。何等爲九。謂未至定。若初靜慮。靜慮中間。餘三靜慮及三無色。除第一有。

復有十智能覺。一切所知境界。謂法智類智。若世俗智。若他心智。若苦等智。盡無生智。此廣分別如聲聞地。

又瑜伽師有五加行。一爲欲證入正性離生。二爲得上果。三爲進離欲。四爲欲轉根。五爲引功德。

復有瑜伽三三摩地。一空三摩地。二無願三摩地。三無相三摩地。

復有三種一切行向住果者根。一未知欲知根。是行預流果向者根。二已知根。是預流果已上乃至行阿羅漢果向者根。三具知根。是住阿羅漢果者根。

復有九道。云何爲九。一世間道。二出世道。三加行道。四無間道。五解脫道。六勝進道。七下品道。八中品道。九上品道。世間道者。謂由此故能證世間諸煩惱斷。或不證斷。能往善趣。或往惡趣。出世道者。謂由此故能證究竟諸煩惱斷。加行道者。謂爲斷惑勤修加行。無間道者。謂正斷惑解脫道者。謂斷無間心得解脫。勝進道者。謂從此後發勝加行。下品道者。謂能對治上品煩惱。中品道者。謂能對治中品煩惱。上品道者。謂能對治下品煩惱。

復有四種對治。一厭壞對治。二斷滅對治。三任持對

### 治四遠分對治。

復有十六行相。謂觀諸諦爲無常等。如前已辯。

復有八種修習。如是對治。如是行相。如是修習。如前定地及聲聞地應觀其相。

復有二品攝一切法。一有漏法。二無漏法。此二如前應知已辯。

復有五果。一異熟果。二流果。三離繫果。四士用果。五增上果。

復有十因。一隨說因。二觀待因。三牽引因。四攝受因。五生起因。六引發因。七定異因。八同事因。九相違因。

### 十不相違因。

復有四緣。一因緣。二等無間緣。三所緣緣。四增上緣。如是一切果因及緣。如菩薩地等已辯其相。

復有七種補特伽羅。謂隨信行等。復有六種阿羅漢。謂退法等。復有八種補特伽羅。謂行四向及住四果。建立應知如聲聞地。

復有六種偏智。一者不定地有漏諦偏智。二者定地有漏諦偏智。三者無漏無爲諦偏智。四者無漏有爲諦偏智。五者順下分結偏智。六者順上分結偏智。復有二種究竟。一者智究竟。二者斷究竟。智究竟者。

謂盡無生智自斯已後爲斷煩惱無復應知斷究竟者。謂徧究竟諸煩惱斷由彼斷故圓滿究竟證心解脫及慧解脫。

如是略引隨順此論境智相應摩怛理迦所有宗要其餘一切隨此方隅皆當覺了。徧行一切摩怛理迦如攝釋分應知其相。如來法教數無限量何能窮到無邊彼岸。隨此方隅隨此引發隨此義趣諸聰慧者於餘一切應正尋思應正覺了。

瑜伽師地論卷第一百

音釋

鄺

呈延切市中空地也

眩

黃絹切目無常主也

墉

余封切牆也

剏壽樞捐助籌募銀元一千圓

卽上年所收二願款

敬刻

瑜伽師地論五十卷以此功德回向十方同發菩提速登彼岸普渡眾生盡未來際計自五十一卷至一百卷連圈計字四十四萬七千五百二十七個並由願款支付工貲銀元一百三十六圓三分

詳見丙辰年報告書

本年加刻全書目錄

雙

字一千八百五十六個菩薩地品目

算

字三百八十四個尾頁字三百六十

二個其字二千六百零二個又簽條三十二根

每條

百六十六由願款支給工賞銀元十圓六角二分七厘

丁巳年出版補記

民國六年秋九月

金陵刻經處識